

Respèt pa Kabei Blanku

Un yùfrou di 26 aña tabata ke sa kiku hende di edat atvansá ta eksperensíá. Ma no tabata te ora el a topa ku un eksperto di makiahe ku el a kai riba e idea di bisti komo un señora bieu. Pues, na aña 1979 Pat Moore a inisiá su ekskurshon di tres aña den biehes. Ripitidamente el a soportá e proseso di tres ora di makiahe, pa e por parse un señora di 75 pa 85 aña di edat. Ku e desfrás aki el a bishitá mas ku 100 siudat.

Durante e tres aña, señorita Moore a hunga ròl di tres diferente machi bieu di tres rango ekonómiko distinto pa e por deskubrí kitrato ku kada un ta haña. Notabel tabata ku el a eksperensíá krueldat komo kariño.

Aparentando komo un señora loko, sin abilidad pa komuniká, sumamente pover, bibando riba kaya, e tabata e resipiente di obranan di karidat. Hende ku a kana pas'é sin ku el a ripará, a bira bin dun'é plaka òf kuminda. Algun, sin mishi ku ne, a pone kuminda na su pia. Otronan a purba komuniká ku ne, ofresiendo un kama p'é anochi. Ma e tambe a eksperensíá krueldat. Un hòmber adulto bon bístí sin provokashon a skupi den su kara ora el a kana pas'é. Na un otro okashon, mientras e tabata kana riba kaya, un grupo di mucha hòmber tabata hari'é i tir'é ku piedra. Un piedra asta a alkans'é den su kara.

E di dos ròl ku el a hunga tabata esun di un wela bieu di klase medio. Komo tal, yùfrou Moore a ser asaltá i di stot riba trapi pa e kai. No tabata te ora el a kuminsá piki su pèrtenensianan ku el a ripará ku un hende a hòrta su tas. Vários siman despues, el a sinti un doló intenso i un brasa rònt di su garganta. Tabata mas òf ménos ocho mucha hòmber di 11 pa 13 aña. Maske nan a kita su tas inmediatamente, tòg nan a tumb'é, batié i mand'é ku skòp. El a sufri heridananan interno i eksterno komo resultado di e atrako ei.

E di tres pèrsonahe tabata di un señora riku: un dama ku a biaha den promé klase, a hospedá na hotèlnan di sinku strea, a hasi uso di servisio di taksi, èts. El a nota ku hende a trat'é masha bon, pero ku hopi bes el a ser ekskluí. Ku frekuensia e bendedó a debolb'é ménos sèn, keriendo ku e lo no ripará tòg.

Den tur tres ròl, yùfrou Moore a nota ku ansianonan, hende ku ménos kapasidat i indefenso, frekuentemente ta víktimanan di deskriminashon. En general, esnan mas hóben ta haña preferensia i atenshon.

Maske Pat Moore no a hasi su eksperimento na nos islanan, ta visto ku den nos komunidad hopi bes respèt pa esnan di edat atvansá ta laga hopi di deseá! Na lugá di apresiá nos grandinan pa loke nan a hasi pa nos, na lugá di skucha nan konseho akumlá for di nan añanan di eksperensíá, na lugá di duna un man ku nan nesidadnan di biehes, hopi bes nos ta deshasí di nan na kas di sosiegu. Laga otro hende sòru pa nan, pa nan no ta un molester pa mi, ta e mentalidat.

Respèt pa esnan di edat atvansá ta un rekisito di Palabra di Dios. “Bo mester lamta para den presensia di esun ku kabei blanku, onra e ansianonan...” (Levítiko 19:32). Ta un bista masha mahos (pero mas i mas komun) pa mira un hóben sintá slòns duna man na un pachi bieu pará. Ta parse ku poko hende awendia ta dispuesto pa kansa kurpa pa lamta para pa mustra respèt ora nan ta saludá un pèrsona. Den nos era ku ta adorá hubentut, bunitesa, forma di kurpa, i abilidad, nos mester paga bon tinu na e palabranan aki.

Beibel tambe ta enfatisá ku nos mester respetá esnan ku ta indefenso. Hopi bes esakinan tambe ta hende di edat atvansá. “No maldishoná un hòmber surdu, ni pone un piedra dilanti di un siegu p'é trompeká...” (Levítiko 19:14). Kuantu bes nos ta hasi chèrchi di hende grandi, (i) esnan ku no por tende òf mira!

Piò ainda, mas i mas ansiano na nos islanan ta birando víktima di krimen. Sin bèrgwensanan ta atraká un machi òf pachi bieu indefenso, dunando e un susto formal (tin bes, un susto fatal), djis pa pone man riba un par di florin ku a sobra despues ku el a kobra su penshon di biehes.

Un dia lo ta bo turno pa ta un ansiano. Beibel ta kòrda nos ku loke “hende ta planta lo e kosechá tambe” (Galationan 6:7). E trato ku bo ta duna ansianonan awe, ta e trato ku bo ke kosechá mañan?